



N bun punt à i ghesc ladins condüt a ciasa l'ultima sabeda. La Val s'è indormedì ia le pröm tēmp, mo à spo mostrè carater y determinaziun a avalié le resultat.

Tignì le comane a cé de tlassamënt se fej intres plö rî, mo n punt é miù co degügn. Bele la sabeda s'à i sógadus ladins metü sön trù por jì a Uttenheim a se mosorè cun le Mühlwald. Decuntra s'à la formaziun de Floriani bele stentè de Copa Provinzia y porchël esun cosciënc che al ne se trata nia de na spazirada .

Por La Val mët man mal la partida, deperpo che i pustri se mostra atira plö stersc y plö aggresifs, insciö i garetera bele al 19[^] le gol dl vantaje. Le sógadù a mezciamp arlungia le palê al atacant Oberhuber che prô le palonët al verdaporta Julian. Chësc ti gareta y insciö se porta le Mühlwald sön le 1 a 0. Sön le gol mantëgn i sógadus ladins i nerfs y reagësc atira cun na gran ocasiun. Stefan prolungiëia le palê sön la fascia de Alex E., chësc se infiltrëia tla defenjiun aversara y subësc n fal te area de straufunga. Le mandl fosch mostrà sön le punt di ònescmetri sënza síghité. Le rigorist Michi se presentëia sön le punt, mo ala trata é le verdaporta bun de individué la direziun y rebat le palê fora de porta. Atres ocajiuns da gol ne é tl pröm tēmp nia da alzè fora.

La reaziun da pert dla squadra ladina tla pröma mesora tla secunda fraziun é ejemplara. I sógadus a mezciamp adüm ai atacanc ciafa crëta de sè instësc y da dant le ritm de jüch. L'atach ladin se fej intres plö prigorûs cun de vigni sort de inserimënc. Sön na crossada de Michi abina Stefan le palê al jôre mo le splundra sura porta fora. Püch dô sön na rebatüda dl verdaporta ne röia Michi nia a dert'ora sön le palê che vëgn ciàmò defantè dal defensur puster al'ultim mumënt. An mëss porchël aspetè al 69[^] por udëi la realisaziun dl pêr: Al limit dl'area vëgn la trata de Stefan rebatüda dal mür defensif, al dërt post é Alex E. che ciafa le palê sön le pé y cun na bela trata sön le pé lunch de porta ne à le portier degüna poscibilitè a parè. Le resultat é avalié mo sëgn é la formaziun dl Mühlwald che se descëda. Prigorosa é la crossada al 80[^], daulache le palê passa bel plan ia la linea de porta, por fortuna ne röia le atacant puster nia a apogè la cogura te sach. Ti ultims menüc se fej la nervositè te ciamp inçe udëi, influenzada dai scrai dl publich y dales incomprenjiuns dl arbiter, che ti fej perd la luziditè y les ultims forzes ai sógadus. Sön vigni palê vëgnel impò ciàmò combatü por chirì le vantaje mo le resultat ne müda impone nia.

Le pêr ti va bun a trames scuadres y an pò ester cuntēnc de avēi remuntè le resultat. Insciö se fej le comane a cé de tlassamēnt do la setima partida de campionat tres plö rî.

Formaziun La Val:

1. Julian Moling, 2. Elmar Valentin, 3. Marco Castlunger, 4. Paolo Vallazza, 5. Egon Frenes , 6. Freddy Sottara, 7. Michi Frenes, 8. Max Nagler, 9. Manuel Stampfer, 10. Stefan Sottara – capitan 11. Alex Elzenbaumer

Alenadù: Claudio Floriani

Proscima partida: en domënia te cíasa a La Val dales 14.30 cuntra le Gais.

Sostituziuns:

Felix Nagler gnü ite imped Max Nagler (45^a menüt)

Adrian Miribung gnü ite imped Manuel Stampfer (45^a menüt)

Alexander Miribung gnü ite imped Egon Frenes (75^a menüt)

Resultac dles atres partidas: [RESULTA C](#)

Insëra, mercuri ai 23 de aurì él gnü sughé l'andata dla semifinala de Copa Provincia cuntra la squadra da Ritten, che süga le campionat trê te 3 categoria mo te n ater girone. La squadra da La Val à incuntè na squadra sterscia, che à lascè udèi sües cualitês portan a ciasa la devènta por 2 a 0. Ai 7 de mà gnaral sughé le ritorno sön le ciamp dl Ritten.

